

Dithero tsa Tirelano mo Kutlwanong

24/2015 Thero ka Sontaga o o bidiwang Miserikordias Domini, e le ka 19. 04. 2015

Mo leineng la Modimo o e leng Rara le Morwa le Mowa o o Boitshepo_

Lefoko le le okamelang beke eno le kwadilwe mo go Joh. 10:11a. 27, le re: AKe nna modisa yo o molemo ... Dinku tsa medi utlwa lentswe la me, ke a di itse; mme di ntshala morago.@

1. Sefela sa 219 - 204/213

2. Thapelo: Morena, Modimo, Rara wa rona, yo o nang le bopelotlhomogi, wena Morwa, yo o tsositsweng mo losong, yo e leng Modisa yo o molemo wa dinku tsa gago, o re abele Mowa wa gago gore fa re utlwa lentswe la Modisa wa rona re itse yo o re bitsang rotlhe ka leina gore re mo sale morago kwa a re etelelang pele teng. Re kopa jalo ka ene Jesu Keresete, Morwao, Morena wa rona yo o tshelang, a busa mmogo le wena le Mowa o o Boitshepo, Modimo o o osi, jaanong le ka bosakhutleng. Amen.

3. Lefoko la Testamente e kgologolo le kwadilwe mo go Hes. 34:1-16.31;

Epistolo ka fa thulaganyong ya 2 e kwadilwe mo go 1 Petoro 2:21b-25;

Efangele ka fa thulaganyong ya 5 e kwadilwe mo go Johane 21:15-19.

4. A go ipolelwe tumelo ya bokeresete!

5. Sefela sa 216 - 201/209

6. Thapelo ya mmadi wa thero.

7. Efangele ka fa thulaganyong ya 1 e kwadilwe mo go Johane 10:11-16.27-30, e re: Jesu a re: "Ke nna modisa yo o molemo; modisa yo o molemo o beela dinku botshelo jwa gagwe. Yo e leng morapiwa (molalediwa), e se modisa, yo dinku e seng tsa gagwe, fa a bona phiri e tla, o tlogela dinku, a tshabe, phiri e di tshware, e di falatse. Yo o rapilweng (yo o laleditsweng) o a tshaba, ka e le morapiwa (molalediwa), mme a sa kgathalele dinku. Ke nna modisa yo o molemo; ke itse tsa me, e bile ke itsiwe ke tsa me, jaaka Rara a nkitse, le nna ke itse Rara; ke bile ke beela dinku botshelo jwa me. Ke na le dinku di sele, tse e seng tsa lesaka le; le tsona ke tshwanetse go di tsisa; di tla utlwa lentswe la me, mme e tla nna letsomane le le lengwe fela le modisa a le

mongwe fela.' ... 'Mme lona ga lo dumele, ka gonne ga lo dinku tsa me, jaaka ke lo boleetse. Dinku tsa me di utlwa lentswe la me, ke a di itse, mme di ntshala morago. Ke di naya botshelo jo bo sa khutleng. Ga di ka ke tsa latlhega, le fa e le ka motlha ope; le gona ga go ope yo o ka di phamolang mo seatleng sa me. Rre yo o di nneileng o mogolo go botlhe, mme ga go ope yo o ka di phamolang mo seatleng sa ga Rre. Nna le Rara re bongwefela.'" Amen.

8. Thero: Phuthego e e rategang mo Moreneng wa rona Jesu Keresete, kajeno ka Sontaga wa Modisa yo o molemo ka fa thulaganyong ya ngwaga wa kereke, Sontaga o bidiwa Misericordias Domini. Leina leo le na le lentswe le le re itumedisang mo ditsebeng, le fa re sa itse Selatini, le re senolela pelo ya bopelotlhomogi jwa Morena. O ka re: Ga go bonagale motswedi o mongwe wa pelo ya Morena wa rona o o penologang bopelotlhomogi jwa Modimo jaaka setshwantsho sa Modisa yo o molemo wa rona yo o re ithwesitsheng mo makgetleng a gagwe go re busetsa kwa gae, mo lesakeng sa gagwe, re ntse re nne dinku tse di timetseng. Ba bantsi fa gareng ga rona ba setse ba ithutile sefela se sentle sa bana ka Setlhapi, se se reng: *AI am Jesus= little lamb; Ever glad at heart I am. For my Shepherd gently guides me. Knows my need and well provides me. Loves me every day the same. Even calls me by my name.*@ Se re ka Setswana: AKe kwananyana ya ga Jesu. Ka metlha ke itumetse mo pelong, gonne Modisa wa me o nkgoga ka bopelotlhomogi, o itse tse ke di tlhokang, o a di nkabela. O nthata ka metlha. Ke nnete, o mpitsa ka maina a rona. Fa re gopola gore re setse re fetile mo go tse di bolelwang ka sefela seo sa masea, re tlhoka nakonyana gore re tlhatlhobe sentle tse di bolelwang ke Jesu, fa a itshupa gore ke Modisa yo o molemo. Go a diragala, fa re setse re godile jaanong, ga re thole re le dikwanyana fela, mme re ikaya, fa re le dinku tse di godileng, gongwe diphelefu. Le fa go ntse jalo re sa ntse re tlhoka Modisa.

AKe nna Modisa yo o molemo.@ Boitshupo jo ga se setshwantsho fela. Ke tshenolo se se buang tota. Fa Jesu a itshupa, a re: Ke nna, jaaka go kwadilwe gangwe le gape mo Efangeleng ya ga Johane, boitshupo joo bo tswa mo leineng la Modimo o o Boitshepo le le dirisiwang mo Testamenteng e kgologolo, kwa Modimo o ipitsang teng, wa re: ANna ke nna yo ke leng ene!@ Leina le le reng Ke nna le supa kutu ya Sehebere sa leina le le reng Yahweh - Ke nna yo ke leng ene. Ke leina le le neng la senolela Moše se Modimo e leng sona mo setlhareng se se neng sa šwa, se sa šwe. E ne e le leina le Baiseraele ba tsamaile ngalo go ya mo kgololesegong ya bone. Ke Leina la Modimo la kgolagano ya ona. Ke leina le le sa bilolweng ke Moiserale yo o boifang Modimo. Ba ne ba boifa go le bilola lefela.

Ke nna Modisa yo o molemo. Baporofeti ba ne ba re: Mesia o tla itshenolela ka go disa morafe wa

Modimo. E rile batho ba utlwa Jesu, fa a ipitsa ka go itshupa, a re: AKe nna Modisa yo o molemo,@ ba ne ba kopanya boitshupo jwa gagwe le Pesalome ya 23, pesalome ya ga Davita yo o neng a itse tsa dinku thata, jaaka a ne a disa dinku tsa ga rraagwe, ya re a ise a tlhongwe go nna kgosi. Ka pesalome ya gagwe o a itshwaya, fa e le nku e e sa tlhokeng sepe, e e itumetseng, e ipoka ka Modisa wa gagwe, a re: AMORENA ke modisa wa me, ga nkitla ke tlhoka sepe.@ Ya re Jesu a sena go tla, e le Modimo mo nameng, a itshupa, a re: AKe nna yo ke leng ene, ke nna Modisa yo o molemo yo Dafita a buileng ka ga gagwe.

Ka tlwaelo re kopanya Pesalome e ya 23 le phitlho ka ntlha ya temana ya 4, e e reng: ALe fa ke tsamaya mo mogorogorong wa moriti wa loso, ga nkitla ke boifa bosula bope; gonne o na le nna. Tsama ya gago le seikotlelo sa gago di a nkgomotsa.@ Go molemo, le fa go le bosula go gongwe. Pesalome ya 23 ga e bue ka ga loso, le bua ka ga botshelo, e le botshelo jo bo tlamelwang, le go bolokwa sentle ke Modimo o e leng Modisa yo o molemo. Pesalome e buisega jaaka thulaganyo ya ditiro tsotlhe tse re di direlwang ke Modimo mo go Jesu. O a re gomotsa, o re bothisa mo mafuleng a matalana, Jesu a re: ATlaang kwano go nna lotlhe ba lo lapileng, ba lo imelwang; nna ke tla lo lapolosa.@ O a re tsoseletsa, o re gogela mo metsing a tapoloso a kolobetso, mo motsweding o o penologang, wa metsi a a tswang mo sefapaanong sa ga Keresete go re nosa ka tsotlhe tsa ga Keresete. O a re itshwarela, o re busetsa mo pholosong, o re emisa, re sena go wa. O re gogela mo tshiamong ya gagwe, a re: AKe nna tsela le botshelo le boammaaruri.@ O re isa mo go Rraagwe. Ga go ope yo o ka fitlhang mo go Rara, fa e se ka ene. O re felegetsa mo tsamaong ya rona, fa re tsamaya mo mogorogorong wa moriti wa loso, go re gorosa mo tsogong le mo botshelong, a re: ABonang, ke nna le lona go ya mo bokhutlong jwa lefatshe.@ O re gomotsa ka lefoko la gagwe le e leng tsamma ya gagwe le seikokotlelo sa gagwe. O re baakanyetsa tafula ya bojelo fa pele ga rona go lebagana le baba ba rona ba e leng boleo, loso le Satane. O re abela sejo se se fologang mo legodimong, se leng mmele wa gagwe gore re o je; o re abela weine e e fologang mo legodimong e e leng madi a gagwe gore re a nwe go re itshwarela, go re itumedisa, le go re tshedisa. O tlotsa ditlhogo tsa rona ka lookwane la boitumelo; o tshela Mowa o o Boitshepo mo dipelong tsa rona gore senwelo sa rona se tlale, se penologe.

Tse tsotlhe tseo di lebagana le Jesu yo o re baakanyeditseng molemo otlhe ka loso lwa gagwe mo sefapaanong, le ka go tsoga ga gagwe ka letsatsi la boraro mo baswing. O re kgobokantse jaaka letsomane la dinku gore re tlhokomelwe ke ene, re tshegofadiwe ke ene gore ditshegofatso di penologe, di tswe mo go rona gore le bakaulengwe ba rona ba amogela tse di tladitseng dijana

tša rona gore le bone ba kopanngwe le ditshegofatso tseo tse di tlhagang mo go Keresete.

Ke Modisa yo o molemo. Jesu o tswelela ka go tshwaya tse di rewang ka boitshupo jo jwa gagwe, a re: Dinku tša me Ake a di itse, le tsona di a nkitse. @ Modisa yo o molemo o a go itse bogolo go wena ka fa o ikitseng ka teng. O a go itse, o itse thata ya gago le bokoa jwa gago, poifo ya gago, le maleo a gago. O a go itse, jaaka moagi a itse ntlo e a e agileng. O a go itse, jaaka modisa o itse dinku tsotlhe tša gagwe, le maina a tsona. Jesu ke Lefoko le le go dirileng, le le go biditseng gore o bopiwe mo sehopelong sa ga mmago; o sa ntse a go bolokile le jaanong. O itsiwe tota, le boteng jwa mowa wa gago bo itsiwe ke Modisa yo o molemo wa gago. Dinku di tshwanetse go tlhokomelwa thata go gaisa dipobiwa tse dingwe. Pesalome 23 e tiisa boammaaruri joo. Badisa ba bofilwe tota ka tiro ya bone. Re dinku, gantsi re na le manganga, re a timela, gantsi re latlhega fela; ka nako nngwe re a nyatsa fela. Re betsana ka ditlhogo, re pitlaganya ba ba bokoa. Re dinku tse di ikutlisang botlhoko, re utlwa ba bangwe botlhoko. Ga re farologanye mefuta ya tse di jewang, ke gona go diragalang, fa re ja tse di bolayang tša dithuto tse di timetsang, re nwa metsi mo meweng e e bosula, gongwe re ithaya gore re gololesegile, gantsi re latelang bagogi ba ba tsietsang go gogelwa ke bone mo losong, le mo talhegong ka fa Isaya a kwadileng ka teng mo go 53:6, a re: A Rona rotlhe re ne re timetse jaaka dinku, mongwe le mongwe wa rona a fapogela mo tseleng ya gagwe. @ Modisa yo o molemo o a tshwenngwa, o a swa, gape o a tsoga. O beela dinku tša gagwe botshelo jwa gagwe. Ke se se gakgamatsang tota go utlwa ka ga gagwe. Re utlwa ka ga Modisa yo o beelang ba re leng dinku tša gagwe botshelo jwa gagwe. Bosigo dinku di ne di le mo lesakeng, modisa o ne a lala gaufi le lesaka gore a kgone go di ntsha mo lesakeng phakela, re gogelwe mo mafulong a a botala, bosigo ra diswa ke Modisa gore re se utlwiwe botlhoko, le e seng go utswiwa.

Gopola, fa Keresete a itshupa ka setshwantsho se sengwe, fa e le mojako wa dinku. O beela dinku tša gagwe botshelo, gape o tsosiwa ka letsatsi la boraro. Ga se molalediwa fela yo o tlogelang dinku tša gagwe, fa di tlhagelwa ke kotsi. Ke Modisa yo o molemo, o tlhokomela dinku tša gagwe sentle fela. O rometswe ke Rraagwe go beela dinku tša gagwe botshelo jwa gagwe, gape a tsosiwe ka letsatsi la boraro O re gorositse mo mafulong a kereke ya gagwe go re felegetsa mo tseleng e e leelele ya gore re swe le ene, gape re tsoge le ene.

Mo Kolobetsong re bona Modisa yo o molemo wa rona mo tirong ya gagwe gore a bitse nku e nngwe ya gagwe ka leina, le go e amogela mo lesomaneng la gagwe. Mo kolobetsong o re gorositse mo mafulong a kereke ya gagwe mo lefatsheng, a re tlhapisa mo metsing a botsalo jo bošwa le go busetsa mowa wa rona mo tshiamong ya gagwe. Mo Kolobetsong re tsetswe sešwa

ka botsalo jo bo tlhagang mo legodimong gore re nne bana ba Modimo, re itshwarelwe dibe, re tlodiwe ke Mowa o o Boitshepo. Senwelo sa rona se tletse, se a penologa.

Kajeno kolobetso ga e tlhaloganngwe sentle ke ba le bantsi. Ba le bantsi ba re: Kolobetso ke tiro ya rona e go supelwang ba bangwe ka yona gore molobediwa o dumela mo go Keresete fela. Fa go ntse jalo, ga se tshwanelo gore go kolobediwa bana, ka re sa kgone go bona ka matlho se se dirwang bana, gongwe se se akanngwang ke bone. Mo godimo ga moo re dumela gore Modimo o ntshitse bana mo gare ga ba ba sa dumeleng ka go abela tumelo, ke raya ba ba isiwang mo kolobetsong ka go kopelwa kolobetso le go rapelelwa ke bagolo ba bone le ke basupi ba bone. Gape re a tiisa gore kolobetso ke tiro ya Modimo, e dirisiwa mo leineng la ona, ga se rona ba re dirang mo go yona, gongwe ka leina le ka thata ya rona gongwe ka ya kereke. Ke Modimo o o abelang le masea dineo tse dikgolo tsa ona ka kolobetso, ka dithapelelo tsa phuthego, le ka go reetsa bagolo ba bone go ipolela tumelo ya bokeresete le thapelo ya Morena, le ditiragalo tsa botshelo jwa ga Jesu. Ke gona re na le tsholofelo e kgolo gore le ngwana yo o kolobediwang o tla solofela mo tsamaong yotlhe ya gagwe gore o filwe dineo tseo tse di solofeditsweng ka kolobetso. Ke nnete bana ba tshwanetse go rutiwa, le go gopodiwa gore ba se ka ba lebala tse ba di filweng mo kolobetsong, jaaka ba tshwanetse go rutiwa ka fa ba tshwanetseng go dirisa dithoto le madi a bone sentle. Barutwa ba a tlholwa, ba dirwa ka go kolobediwa mo leineng la Modimo o o Borarobongwe, le ka go rutiwa. Fela jalo masea a kolobediwa go rutiwa le go gopodiwa mo botshelong jotlhe jwa ona, ba ithute gore Keresete ke mang, le gore ke barutwa ba gagwe, le gore Keresete ke Mopholosi wa bone.

Go na le ba ba reng bana ba tshwanetse go gola pele gore ba kgone go ikopela ka bobone go kolobediwa. Mme Modimo ga o re pholose ka go ikopela, gongwe ka go itlhatlholela ga rona. O a re pholosa, fa re dumela. Dinku ga di ikgethele modisa wa tsona. Ke modisa yo o ikgethelang dinku tsa gagwe. Ga se rona ba re dirang Keresete Jesu gore e nne Modisa le Mopholosi wa rona. Ke ene yo e leng Mopholosi le Modisa wa rona ka go beela botshelo kwa gagwe ka ntlha ya rona, le go tsoga mo baswing ka letsatsi la boraro. Ga a gakololane le rona, fa a ne a re swela mo sefapaanong ka letsatsi la botlhano lele. O ne a sa re botse ka gore a lo rata gore ke lo swele, ga lo a itlhaolela go ntshala morago? Ke ene yo o re bakaanyeditseng tse tsotlhe tse di lebaganang le pholoso ya rona pele, re ise re nne teng. Dinku tse di latlhegilweng ga di senke modisa. Ke Modisa yo o molemo yo o di senkang, yo o di batlang, go ya a di bone.

Go itsiwe, fa go tshela mo letsomaneng la Modisa yo o molemo go le bokete gantsi, ga go itumedise ka metlha, gape go tsamaelana le botlhoko jo bontsi le ditlalelo. Ga re a solofediwa

gore ga re nke re lwala, gongwe ga re nke re belaela, gongwe ga go latlhegelwe tsholofelo. Ga re solofediwe botshelo jwa dikgakgametso tse di bonalang. Badumedi botlhe ba tshwanetse go tsamaya mo mogorogorong wa moruti wa loso, mo tseleng ya bone go na le dikgaga le megorogoro e e boitshegang. Foo ga go na pharologanyo fa gare ga tsa badumedi, le tsa ba ba sa dumeleng. Fela badumedi ga ba na go boifa, le e seng go roromisiwa ka tse ba tlhagelwang ke tsona. Re sala Modisa yo o molemo wa rona morago, ke ene yo o re felegetsang, ke yo o phuntseng dikgoro tsa loso, o fentse boleo, loso le Satane ka go tsoga mo losong ka letsatsi la boraro. Go na le tse pedi tse badumedi ba tlhomamiseditsweng mo go tsona. Molemo le boitshwarelo di tla ba sala morago ka malatsi otlhe a botshelo jwa bone jaaka dintšwa tse pedi tsa Modisa yo o molemo. Ga go kitla go feta letsatsi, le e seng le le lengwe fela le dintšwa tseo di sa latswang ka lona direthe tsa rona ka go re gopotsa gore re itshwaretswe dibe, le gore re swetswe ke Modisa yo o molemo wa rona mo sefapaanong, le gore re dinku mo letsomaneng la Modisa yo o molemo wa rona.

Ke tsona tse Modisa yo o molemo a ratang go re tlhomamisetse mo go tsona, jaaka re tlhomamiseditswe mo kitsong le mo tumelong, fa Jesu a ne a re swela mo sefapaanong, le go re tsogela mo baswing ka letsatsi la boraro, le go tshela, le go busa ka bosakhutleng, re kolobeditswe mo leineng la Modimo, le Morwa, le Mowa o o Boitshepo, le go nnela ruri mo NTLONG ya MORENA go ya bosakhutleng. MORENA wa gago ke Modisa yo o molemo, ga o nke o tlhoka sepe. Amen.

9. Thapelo: Morena yo o rategang re a leboga ka o le Modisa yo o molemo wa rona, wa re senka, wa re bona kwa re neng ra timelang teng, wa re sikara mo magetleng a gago ka go re busetsa mo gae, mo kerekeng ya gago, ka re utlwile lefoko la bopelotlhomogi le bopelonomi jwa gago. Re a leboga ka go go lebogela pholoso e o re pholositseng ka yona, rona ba re leng baleofi ka fa tlhagong ya rona. Re lebogela kamogelo e o re amogetseng ka yona gore re nne dinku mo letsomaneng la gago le e leng kereke ya ga Keresete. Bopelotlhomogi jwa gago le lorato lwa Modimo, le kabelano ya Mowa o o Boitshepo a di nne le rona rotlhe. Amen. Thapelo ya Morena: Rara wa rona yo o mo legodimong ...

10. Sefela sa 217 - 202/210

A kagiso ya Modimo e e fetang tlhaloganyo yotlhe e boloke dipelo tsa rona le maikutlo a rona mo go Keresete Jesu, Morena, Morepholosi. Amen.

Thero eno e kwadilwe ke K. H. Schnackenberg, ka ngwaga wa 2014.
Kgatiso le go rongwa ga dithero tseo go tshegediwa ke kopano e e bidiwang The Lutheran Heritage Foundation